



NAGALAND HEALTH PROTECTION SOCIETY

Mozü kidang yaridaktsüsü aodang teyari angutsü puri kodang AB PM-JAY/CMHIS card agütsüsüla ?

Taneptsü teyari bushia aodang, shirangertemi parnok PM-JAY/CMHIS card-ji mozü kidang monger aodang masü saka mozü kidang amongtsü atema tenüing züluokdaktsüba mapang nungjisa agütsüsüla , kechiyong mozü kidang amongdang endokba senotsü meyipa meshitsü atema maparentem mapang shitak nung inyak tenzüksü atema shriangerji mozü kidang amongtsü tenüing züluoker ghonda 24 tsüingdasa tenüing agütsüsübaji kanga tongtibang lir.

Mozü kidang amongtsü atema tenüing züluokba mapang card-ji magütsüra , iba sentong nung aliba teyari aser tajanzüktemji agütsüsüsa mozü kidang meinyaktetsü.

Temetetsü : Iba sentong ajanga mozü kidang monga yaridaktsüba aser mozü kidang memongi pei kidang nungi dang arua asüyonga minor surgery, dialysis, chemo/radiation therapy amala agirtem nemang teyari ya agütsüsü. Mozü kidang memongi pei kidang nungi arua yaridaktsü , Outpatient (OPD), aser peisasa tangalen nungi arua tashidak tendangertem nem iba sentong ajanga teyari magütsür.

Teyari nüngdakra, item mobile phone number mashi ka nung onok ajatsü mesüra WhatsApp ajanga tongteprateptsü akok : 8880515011 | 8880515012 8880515013 | 8880515014



India-i sensotem dang Lebanon linük toktsür aotsü metetdaksür

New Delhi, Luroi/August 01 (Agencies): Lebanon aser Israel na tsüingda tensa tamajungba akümba mapang nung Brihostibarnü India sorkari Lebanon nung alir India nunger ajak dang iba linük toktsür aotsü metetdaksüogo.

Indian Embassy-i, "Region nung tatalokbatem aser amokmeren tensa nung ajemdaker India nungertem dang Lebanon-i maotsü metetdaksür. Iba dak alia tang Lebanon nung aliba India nungertem danga iba linük toktsür aotsü metetdaksür," ta metetdaksü.

"Kuli kar ajanga iba linük (Lebanon) toktsür moutettsüpurtem dang kanga kumdanga alitsü, senzüsempom masütsü aser Beirut nung Indian Embassy den email id: cons.beirut@mea.gov.in mesüra

emergency phone number + 96176860120 ajanga tongteprateptsü metetdaksür," ta Indian embassy-isa metetdaksü.

Israel sepaitemi amakdang Lebanon yimtiba, Beirut yimti tezülen Hezbollah telok nung senior commander, Fuad Shukr tepsetba sülen tensa ano tamajungba kumogo.

Israel-i maneni ghonda ishika lir amakdang Tehran nung Hamas lenir, Ismail Haniyeh tepsetogo. Iba ya ajanga Gaza rara tamajungba kuma region nung rara tulu adoktsüa akok ta bilemer.

India sorkari dang masü saka United States, United Kingdom aser Australia densema tanga linüktemia Israel-Hezbollah rara nung ajemdaker pei sensotem nem tekümdangtsü osang balala metetdaksüogo.

Wayanad nung anentsüh lendong nung asürtem 206 jungogo



August 01, 2024 nü Lok Sabha nung Opposition Lenir aser Congress MP, Rahul Gandhi den party leni Priyanka Gandhi Vadra nati Wayanad district kübok anentsüh agi kongshiba tesemtem semdangdang tangokba noksa nung angur.

New Delhi, August 01 (Agencies): Mongolbarnü Kerala state kübok Wayanad district nung anentsüh lendong tulu atalokba sülen nungi nisung kümzükba maparen tenzüka liasü aser Brihostibarnü iba maparen tembangogo; joko tasümandang bushitsü atema rangloker inyaktsü, ta metetdaksüogo.

Tang tashi nung iba lendong nung asürtem 206 jungogo, ajisüaka asürtemji 300 dak tema ajungtsüa akok, ta Kerala assembly nung Opposition lenir, VD Sathesan-i metetdaksü.

National Disaster Response Force (NDRF) teams, state forces, Indian Army aser defence sepaitemi amang-sangwa methitemi kümzükba maparen inyaka aruogo, saka joko taküm angutsü teimla mali, anungji tasümandang

bushitsü. Osangbenertem den jembidang Kerala Chief Minister, Pinarayi Vijayan-i, jana/lishi agi nembanga alir taküm kümzüktsüsa alirtembo ajak kümzükogo saka samaba nisungtem aika tang tashi mangur, ta metetdaksü.

Karnataka & Kerala Sub Area nung General Officer Commanding (GOC), General VT Mathew-i, "Kümzükba maparenbo tembangogo, joko tasümandang angutsü atema dang rangloker inyaktsü. Ki telung nungi madokteti alirtem kar danga lira onoki kümzüktsü, ajisüaka tzunglu aruba agi tetsükdaktsü agütsür. Nikongdang kümzükba maparen tembangogo," ta metetdaksü.

Brihostibarnü Lok Sabha nung Opposition lenir aser taoba mapang Wayanad nungi MP,

Rahul Gandhi aser teno Congress general secretary Priyanka Gandhi Vadra nati Wayanad district kübok anentsüh agi kongshiba Choorlamala tesem semdangogo.

Tenatisa community health centre ka semdanga iba lendong ajanga takoksa angurtem ajuru. IMD Kerala Director, Neetha K Gopal-i, Wayanad densema north tsütsü aliba district pezü nung 'orange alert' sangdongogo, ta metetdaksü.

Paisa, "Tzunglu maneni arutsü aser Amongnü nungi tzunglu ajema arutsü. Iba sülen ano anogo pezü tashi tzunglu tera arutsü," ta metetdaksü.

Brihostibarnü senden ka nung Chief Minister, Vijayan-i, "Samaba nisungtem ayong nung maneni bushitsü. Kümzükba nisungtem camp nung jenokdakja lir," ta metetdaksü.

Tesüiba küm 5 tsüingda Canada nung India nunger kaketshir 172 süogo

New Delhi, Luroi/August 01 (Agencies): Tesüiba küm pongu tsüingda Canada nung India nunger kaketshir 172 süogo, aser ibaji bendang linüktem nung India nunger kaketshir teimtiba asütsü lir, ta Brihostibarnü Rajya Sabha senden nung Minister of State for External Affairs, Kirti Vardhan Singh-i metetdaksü.

"Tesüiba küm pongu tsüingda linük balala nung India nunger kaketshir 632 süogo. Kaketshir kar lendong nung asü, kar shiranga asü mesüra kar tepsetba liasü. 2019 küm nungi tenzüka tesüiba küm pongu tsüingda India nunger kaketshir 18 bo amakdang asüba mesüra tepsetba liasü," ta union minister-isa metetdaksü.

Amakdang asüba mesüra tepsetba India nunger kaketshir 18 nungjagi 9 bo Canada nung liasü; kasa kuli ajanga US nung kaketshir trok asü, China nung ka, UK nung ka aser Australia nunga ka kasa kuli ajanga asü, ta paisa metetdaksü.

Tanüingba kaketshir 614 ji lendong balala mesüra shiranga asüba liasü aser item kuli ajanga teimtiba asübaji Canada (kaketshir 163) nung liasü. Singh-i, linük 108 nung India nunger kaketshir million 1.33 nung züingdar, ta metetdaksü.

Bendanglen oa azünger India nunger kaketshir teimtibaji Canada nung lir (kaketshir 4,27,000), US nung kaketshir

3,37,630 lir, UK nung 1,85,000 aser Australia nunga India nunger kaketshir 1,22,202 lir, ta paisa metetdaksü.

Canada nung Sikh separatist lenir, Hardeep Singh Nijjar tepsetba nung India-i shilem agia lir, ta Canada-i India nem tai tongloksüba sülen linük ana tsüingda tesendaktep raksa. Ibaji ajanga Canada nung azünger India nunger kaketshirtem atema aikati tebilemtsü katsür.

India sorkari Nijjar ya 'kiralongrar' ta sangdonga liasü. Iba sülen yaküm June 18 nü mejangjaba nisung kari Nijjar khaseta liasü.

Hardeep Singh Nijjar khasetba ken o dak sendakba nung taküm May ita nung Canada ketdangsertemi India nunger pezü puogo.

Nijjar tepsetba ken o dak sendakba nung May 3 nü Canada ketdangsertemi India nunger asem- Karan Brar (22), Kamalpreet Singh (22) aser Karanpreet Singh (28) nunger pua liasü. Iba sülen anogo ishika tsüingda ketdangsertemisa arrshi küm 21, Amardeep Singh apu.

Surrey nung alir Amardeep Singh anema nisung tepsetba aser nisung tepsettsü atema asalentong yangluba ken o benokogo.

Nijjar khasetba nung India sorkari shilem agia lir, ta Canada-i tai tongloksür ajisüaka tang tashi nungbo parnoki kuli magütsüteter.

August-September nung India nung tzunglu 'above-normal' arutsü: IMD

New Delhi, August 01 (Agencies): Brihostibarnü India Meteorological Department (IMD)-i, August aser September ita nung India nung tzunglu above-normal arutsü, ta metetdaksü.

Taküm June ita nungi tenzüka tang tashi nung India nung tzunglu 453.8 mm aruogo, aser ibaji normal level- 445.8

mm dang nungi teimba lir. Brihostibarnü osangbenertem senden ka nung jembidang IMD Director, Mrutyunjay Mohapatra-i, India kübok region teimbaka nung tzunglu normal nungi above-normal arutsü, ajisüaka northeast tesem kar densema east India, Ladakh, Saurashtra

asur Kutch regions, central aser peninsular India tesem kar nungbo tzunglu below-normal arutsüa akok, ta metetdaksü.

India nunger aluyimba sector nung tzungluruwa mongpu ajanga kanga tongtibang shilem agir, kechiyong aluyimba li shilem 52 bo tzunglu tzu dak dang metaloker.



Lucknow, August 01, 2024: Brihostibarnü Uttar Pradesh state legislative assembly nung Chief Minister Yogi Adityanath-i jembidang tangokba noksa nung angur.



TIR YIMYIM

YIMOBILEM (EDITORIAL)

DIMAPUR ROGONÜ, AUGUST (LUROI) 02, 2024

Aluyima Tsüngremmung mungdi !

I bai Ao kin asoshi Tsüngrem tashi aser temoatsü bilemteta amungba Tsüngremmung benjong mapang lir. Aji oda, benjonga rongnunga teyanglur aser temoatsür Tsüngrem tetshia amungba benjongbo ibai dang lir. Iba mapang alima yanglusang aser ali rongsen moatsür tsüngrem Lijabai yimtsüngtem semdanga arur ta tsüraburtemi amang, anungji pa agizüka temoatsü meshitsü asoshi iba benjong munga atar. Iba jagi iba benjong dang ya Lijabamung ta-ka ajar. Joko, iba benjong munggerbo nisung ajak alulem masü ninok bener alu aroi aotsü aser asen chi chiyong tenzüksü. Iba ama alu nung azükaru mapangji ataloktsü atema asen akhi tsüraburtemi parnoki amanga külemba tsüngremtem dang yipru mopong, ozü sangnu aser arem shirurutem nung alu kümzüka moajang ta sarasadema iba Tsüngremmung munga aru. Atangji, tanü asenoki iba Tsüngremmung benjong amunger saka akhi ama masü, lokti kari benjongmung sentong balaka mayongzükra kija kibongtemibo kecha balaka süoki ia iba asen sobaliba benjong ya mamonger. Ibaji asenoki tanü tsük lu mayimba ajanga lir. Asenok akhi sobaliba benjong ajunga ya alu mapa dak sendaka lir aser alujia tanga lu masü saka tekong nung ayimba tsük lu, anungji tsüklu mayim ser Tsüngremmung dang masü saka Moatsü amungtsübajia mazümazür aser mapet akümer. Aji oda, asenok sobaliba benjong shiaji alu mapa tapu ka atemba aser alu mapa ano tapu ka tenzükba mapang ka asütsü, anungji asenoki alu meyimra item benjong amungtsüba mapangjia amadoktsü. Christmas, New Year, Durga Puja, Diwali mesüra eid al fitr benjong ama yabo alu mesüra mapa inyakba sobaliba dak sendaka mali, anungji alusa mayimyonga shiba kechi mapa inyakdir inyakaka item benjong amongtsüba yabo petpeter. Ajisüaka, asen sobaliba benjongtem Tsüngremmung aser Moatsü amabo asenoki tsük lu meyimra amadoktsü aser amungtsüa nungdak madoktsü. Tanü tashibo asenoki tsük lu mayimyonga Moatsü aser Tsüngremmung munga arur, saka ibai akhi mapang atalokba mapatem indang otsü angazüksü amunger amai ka dang kümadoker. Aji oda, Tsüngremmung amunger ser nung Tsüngremmung tetezüa memetet mungteper, iba jagi Tsüngremmung tetezü tama rateta ashitsüsa akümer. Ashi, asenoki asenok peridanga arotsüsa tsük lu tilaka danga ayim asübo, alu nung tzük tenma dang moatsü amungtsü yongyatsü aser alu nung tsükjung adoka amen tenzük dang Tsüngremmung amungtsü yongyatsü. Tanü asenoki iba aluyimba sobaliba shia arudakja tsük lu ayimtsü nungdaker aser aji mapa tasaka masü. Aji oda, tular tilar aser takar sensaker ajak chi chiyonga taküm alitsü, anungji kechikomaka uludir uluaka alima nung aluyimer nungdaksü, anungji item aluyimertemji asenok asütsüla. Asenokibo tangar dang dena ayoktsüsabo tsük lu meyimtetsüa akok saka asenoki asen peri danga mesüra moatsü aser tsüngremmung amungtsü bilema danga küm shia tsük lu tilala danga yimra, idakji asenok asentzü sendoktsü, asen tetsü oshi mesamadaktsüi jembitsü aser benjonga asen alu mapa den petpeta amungtsü. Asenoki tanü putu nung tsük lu mayimba agi benjong amongtsü mebiletetba dang masü saka asen tetsü oshi jembitsüa nungdaka madoker, kechiyong asen oshi nung olong teimbaka mapa dak sendaka lir aser asenoki inyakba mapaji, tanü ama mapa tapu aika masü, saka tekong nung tsük lu ayimbaji dang yimkong mapa liasü. Aji oda, tanübo asenoki tsük lu mayimba agi alulem, mertsüng, ninok, pakti, chi, jen, chirong, ten, luti, pen, maipu ta jembiba olongtem ya dang masü saka 'tsük' ta asüba tetezüa memetet kümogo, kechiyong tanü lanurtemibo jang dak alaka tsük mengudang, anungji parnok aikati alu nung jang ya yamai züsenteter amai bilemer. Item tebilemstütem ya asenoki tang ama Tsüngremmung benjong amungdang shisadanga jembiteptsüla aser asen yanglusang Tsüngrem mamai asen sobaliba benjong ajak shitak munga asen oshi aser asen senso ayak mesamadaktsüi alitsüsa tsük lu tilalabosa ayim nung junger.

OLEMSABANG

TSÜNGREM MONG

~ I.Shilu Jamir, Dimapur.

(Yashi adok nungi...)

a. Sungben Mong (Mezüngnu): Mezüngnu benjong piyong atema süng, aonsotsü, tachi tajemtsü, sobosolemstü, yi aser mejemstütem ajak tetsürtemi renema anebalua ayu. Teburtemia ki sobo enoka merükmejua kima tongshi nung Longkitsüngba süngsem tou bener arüa alenloka ano Tir kidang süng benokja merükteta renema yutsür aser itemjagi yamaji anempongera ta meteter.

Iba sülen süzüngzü akidang mapang lia nungi arem nung ajioka yua alibaji nübur rongnung shiba dak amsü kaadir pa jagi anir shizüng züji ateni or bener adoktsü. Arem minak tiyong nong aliba shizüng züji tajung yaren aketba Tsüngremi ozü yimkong nung moatsügo ni ta ok atena meyua bener pelatepa adoktsü. Yimertem yim among tashi lenji arua kanga pelaseta ajurüteper külemi longsotepa shizüng zü tuluji apur yim atongtsü.

Asangurtemi anir yikoben süng agi yangluba nokleptsü tasen nung ang nemnem angsü temesüng agi yanga yanglur aser akartemibo yongmenjang azük azüker meyua longsotepa pelatepa yim mepu tiyong tonga bener adoka ayutsü. Iba anogo item maparen aja ayanga inyaktepba tensa nung asangurtemi pei meima aliba ayir nem mokopong tasen chitetsütsü aser ayir temia pei miema aliba asangur nem ang nemnem temesüng agi nokleptsüyi tasen yanglua sempettsü.

Yamaji tsürabur putu tensa benjong mongpu meteta ayir shibai ang mesungji tiemba yanglua agütsüdir ta toktep dang amang nung mejanga amoa moi benjong shizüka meranga inyaktepba yimya tajung benshia aru aser yamaji inyaka yanglua agütsütepba jagi parnok tsüngda anikilen asoshi kuli tajung agitepa kibalembutepa lia aru. Yamaji tsüraburtemi benshia inyaka aurba asen Aoer sobaliba tajung renema yuja lir.

b. Zünga Yongya Mong (Tananü): Iba anogo anepdang yakta arju Tir kidang putu yimsüsür mepu zünga kidong shia tambo kidang ak tulu tepseta yimsüsür ajak jaoka benjong yongya atatsü. Anepdang chiyongkiong temer anüngdang ajak anüngsa lenden nung atenshia tsüngsangteba asaya yimya tapu balala toktepa sendong agitsü. Ayir asangur tembo shizüng tsüktepa saisaponga longsotepa pelateptsü. Longsotepa lemsatepa pelatepa chia jemtepa benjong amongba agi Tsüngrem peladakja nubur moatsür ta züngshitep.

Anüngdang chiyongkiong temer anungsa lenden nung ajak atenshir yartsüngsang aser asaya tapu palala toktepa asayatsü. Nikongdang joko takar, yimsüsür, putupur ki maka, yi jema Tsüngrem Mong ken aser süngnaro ken tentepa pelatepa longsoteptsü.

c. Yatimong (Tasumnü): Tsüngrem Mong tatem nü tetsür tebur arr atsütepa tsüngsangtepa tobur tazünglen tetsür talaklen amer arr ken tentepa atsüteper, teburi tetsürtem peladakja tetsürtem nemsä kokdaktsür. Tetsürtemi ajongtong aser kilang ken tena, teburtemi yar tsüngsang den asaya tapu palala sayua asayatepa amongtsü ano nikongtsütsü nungi sendong palala metenloka aotsü.

Tsüngremmung benjong yatimung anogo tempanga arudang paonungji tetsürtemi pei pei tsüki nung oa ataa alidang teburtemi amang piyong memejangi pei pei tedong nunger tsüki jagi sema oa ken palala tentepa lutsuntepa langzütepa pelatepa asayatepa longsotepa menungraseta item ken ya tentepa aser saisapong item ya sayaa benjong tempang.

Tetoktepa asayatem. Yati anepdang sendong.

1. Arr atsütepa = Tug of War
2. Tetsüng jajatsü (lungmi agi yangluba)
3. Nü tsüshitepba = Spear throw
4. Shipak/Zülela tsüktepba =
5. Alemshishiba = High jump
6. Pongshishiba = Long jump
7. Ashi/Süngjang tsüktepba =
8. Mezüng tsüktepba = Top play

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh state nung pastor Varghese Chacko dak azük



Manoj Zachariah aser pa kinüngtsü Alka Manoj (BJP Vice President, Telangana Minority Morcha) na den Chhattisgarh Civil Forum (CGCF) Tir, Arun Pannalal (ajichilen mezüngbuba) nungeri Union State Minister for Home Affairs, Bandi Sanjay Kumar (naro ama alisang) ajurudang tangokba noksa nung angur.

August 01, 2024: Tang India tesem balala nung Khristantem anema inyakba kanga bulua atalokba mapang Chhattisgarh state nung telok kati pastor ka dak azük.

July 21, 2024 nü Dhamtari jila nung Pastor Varghese Chacko Arogo züngsem ka meyong ki tasen meshitetsüba sentong nung adendang yimdaklir nisung 20 arua timtem agütsü.

Ki tasen meshitetba sentongji Hindu nunger tekülem ki ka anasa liasü. Iba tekülem kidang nungjagi Hindu nungertemi Khristantem ki tasen ka nung adenshibaji repranga liasü.

Pastor Chacko ki tasenbaji tonga arudang Hindu nunger telok kaji aruba sülen sarasadem sentongji tang anenang ta tuyu.

Hindu nungertem jagisa, iba sentongji Khristantemi tangartem Khristan yimsü dangi meyipdaksütsü nükjidong nung ayongzükba lir, ta tai tonglokja police nem osang metetdaksü.

Police aruba sülen pastor dang iba tesemji toktsür oang

ta ashi.

Pastor Chacko kidangi meyipa aotsü lia lokti jagi pa meyong garitsüng ka pokreptsü, anungji pa anasa aliba gari dokan kati oa garitsüngji yanglushi saka telok jagi maneni pa sülen anidakba sülen pa gari nokdang aser pa gari nungi anizüka pa dak kanga mejungi azük.

Pastor Chacko temang aser tekolak mejungi yiru saka telok jagi maneni pa Hindu nunger tekülem ki kati anir aoba sülen kangshia Hindu nunger süngyanglu ka matsüngdang apudakdaksü.

Pa kanga mejungi yirur liaka pai gariji par medemer doctor ka ki tashi anir otet. Doctor-i pa temang anepalutsü aser yiruba zübo arrja liasü. Iba sülen July 22 nü hospital ka nung CT scan agiba ajanga telung zübobob maliasü, ta jangjaogo.

July 20 anogo nunga Dhamtari jila kübok Sambalpur yimdak yimsüsürtemi Khristantem jaok. Ozüng alema yimdak Khristantemi Tenla ki yanglur ta parnok nem

tai tongloktsü.

Yimdaklirtem jagi Khristantem amokmeren aser Tenla ki asübaji nokdangang ta Hindu teloktem aser ketdangsertem dang mepishiogo.

Osangbener den jembidang Chhattisgarh Christian Forum (CCF) Tir, Arun Pannalal-i, "Tawa police-i aibelenertem anema kecha meinyakba atema Chhattisgarh Civil Forum (CGCF)-i tebilemtsü akaba temaba ketdangsertem den lemsatop. Police-i kecha meinyaketba agi Khristan ana tepsetba atema temaba ketdangsertem nem metetdaksü saka state home minister mesüra chief minister napronglai telangzüba kecha magütsü. Anungji CGCF-i Union Minister of State for Home Affairs, Bandi Sanjay Kumar ajurua pa nem temepishiba shidi ka agütsüogo. Minister-i iba tensa atema tejashi lemsatopogo aser nisung tepsetbaji süoki ia agitsü ken o ka lir ta shiogo. Minister-i iba ken o reprangshitsü ta CGCF dang nangzükogo," ta metetdaksü.

Kerala HC-i Khristan ana pusema obendang agütsü

August 01, 2024: Tawa Kerala High Court-i tain ana educational certificates nung Hindu yimsü nungi Khristan yimsü dangi meyipba melaa liasü; ibaji ajanga tatishitsü tajung ka sayur, ta International Christian Concern (ICC)-i metetdaksü.

Kerala state kübok Kochi yimti nung lanur tain anati Hindu yimsü toktsür Khristan yimsü dangi meyipba sülen school certificates nung Hindu agi Khristan, ta melentsü pusema High Court-i obendang agütsü.

Arrshi küm 24 jakrep-Lohith aser Logith nati Khristan yimsü dangi meyipba sülen tena indang school certificates nung yimsü melennüa liasü saka

ketdangsertemi certificates nung yimsü melentsü memela.

Ketdangsertemi, school certificates nung yimsü melentsü atema telatetba kecha mali, ta ashiba sülen jakrep adianu nati court nem temepishiba ken o agüja liasü.

Kerala HC-i, "School certificates nung yimsü melentsü atema telatetba kecha meliaka iba nungji ajemdaker nisung kaji akümlipiyong yimsü ka dang amangtsüla, ta mali. Yimsü mashie benshitsü mesüra kechi yimsü amangnüdir amangtsü atema linük temzüng kübok Arrla 25(1) ajanga ajak nem temeden agüja lir. Iba temedenji amshia nisung kati tanga yimsü ka dangi meyipra

pa indang reocrds nungji nungdakba melenshitsü akok," ta metetdaksü.

Lohith aser Logith na tsüraburtemji Hindu nunger lir aser 2017 küm May ita tashi Hindu yimsü amangertem liasü. Iba sülen parnoki Khristan yimsü agizüka Kochi nung aliba Arogo ka nung baptia liasü.

Parnok Khristan yimsü dangi meyipba sülen jakrep jabaso ana jagi school certificates nunga yimsü melennü liasü. Tenati Controller of Examinations dang certificates nung yimsü melentsü mepishi saka magizükba, ajisüaka tenung melentsü atema dang temelaba agüja liasü.

ANOGO ABEN TSÜNGREM DEN

Tatidangba Tajemmetdak

"..... Tsüngrem taochi jungkai adokogo; aser asenoki memeshiba aser alima azüapung menanzüki, teshisadangba, temeshi Tsüngrem tsübuaya akümlitaküm alitsüsa..." (Tit. 2: 11, 12).

Kodangsa nai Tsüngrem matenba tashi den hai-aura kadir, nai tatidangba ajurur. Tatidangba ajak nükjidongji Tsüngrem medeni shi nungdak ajak atalokdaksütsü atema ajaba lir. Aser koba agi na Tsüngrem nungi piladaksütsü Tsüngremi meteta lir.

Khrista nungi anguba nung masü satani agütsüba nung nai kodang temulung süa kümdir, na telemtetba kikümbang nung nokdaker ta bilemtetang. Idangyongji nai "Khrista dang tashi angatsü tepuoker ka" (2 Kor.10:5) ta mebilemtetra, nai temelen ka shimtsü. Iba jagi ne mulungjang meyushitsü, idangji ne tejangraba ajungmesotsü aser iba tatidangji tuluba akümstsü, aser tatidangba nem kokdaksütsü.

Tatidangba ajak nungi jenbuttsü Laishiba nung lenmang sayua lir (I Kor. 10: 13). Saka tatidangba kiküm nungi adokba shitakba jenbubaji lir. Tatidangba kiküm nungji nai mazüokra tatidangbai na azüoktsü.

Nai temenen mapa kar inyaksü mapang tajung ka ajurudang, nai ni temenen nungi pilaago, anungji ni ya meinyaksü ta mulungtetra, nai tatidangbaji azüoker, saka nai iba mapang tajungji kodang shisadanga lidir tatidangbai na azüoktsü. Nai pa aputsü mesüra pai na aputsü.

Temeimba Tsüngrem, ni Ne sentong nung tashi anganer. Kü dang yariang.

Gospel Music Association Dove Awards nominations sangdongogo

August 01, 2024: Gospel Music Association (GMA)-i 2024 Gospel Music Association Dove Awards sangdongogo aser osangtajung kentener karibo nominations 10 dak tema nguogo.

Tesüiba küm 54 tashi GMA Dove Awards ajanga osangtajung kenten ajungketja iba award agütsür aser osangtajung ken industry nung kentenerem ajungmesor.

55buba Dove Awards ya October 1 aonung Nashville, Tennessee nung aliba Allen Arena nung kentener, Tauren Wells lenisüba nung agitsü.

Iba sentong ya TBN aser TBN+ na nung dang live sayutsü aser October 4 nüa SiriusXM The Message nung sayutsü.

Taküm iba award sentong omenji "Unite the Song" lir.

Tauren Wells-i sangdong ka ajanga, "Unite the song omen ya Tsüngrem nüburtem telongjem nung adenshitsü atema ayongzükba lir. Asenok nisung shia tesem balala nungi aser Arogo balala nungi adenshir nung 'Holy holy holy is the Lord God Almighty' ken ajanga külemi longjemtsü asoshi lir," ta metetdaksü.

2024 Dove Awards nung nominations teimtiba alirtem rongnung Brandon Lake densema lir. Brandon Lake ya taoba mapang Maverick City

Music nung züngsem ka liasü aser Charleston, South Carolina, nung aliba Seacoast Church nung pastor lir. Taküm Dove Award nominations teimtiba angusangji pa lir. Pa award 16 atema nominate süa lir.

Brandon Lake ya Artist of the Year award atema nominate süa lir. Iba category nungsa Anne Wilson, CeCe Winans, For King & Country aser Lauren Daigle nungera nominate süa lir.

Brandon Lake indang kensep 'Coat of Many Colors'-a Pop/Contemporary Album of the Year award atema-a nominate süa lir.

Music producer Jeff Pardo-a nominations 11 lir aser item rongnung Producer of the Year aser Songwriter of the Year-Non Artist densema lir.

Elevation Worship nung züngsem aser North Carolina nung aliba Elevation Church nung züngsem, Chris Brown-a nominations 10 lir, aser item rongnung Songwriter of the Year-Artist aser Song of the Year densema lir.

Iba dak alia Chandler Moore Chandler Moore nominations 9 aser Jonathan Smith nominations 10 lir. Taküm GMA Dove Awards atema nominate süa alirtem rongnungsa CeCe Winans (nominations 5) aser Naomi Raine (nominations 5) nata desenma lir.

AO OSHI ANGAZÜKDAK:

TANÜ ANGAZÜKTSÜBA OJANG



Takutanang

(v) ken o tajung majung mebendangtet (irrational talk)

* Lokti nung tangari jembiba ken o takutanang angateta jembitsüla.

Takutasü

(adj) tejashi aser timtem tuoshi mapang (moment of grief)

* Takutasü mapang nung Tsüngrem temeim bilemteter.

OLONG PAITEP # 6863

Grid for crossword puzzle #6863 with numbers 1-15 indicating starting positions.

TIPLEN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsümapangüsüadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. _ _ _ _ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. _ _ _ _ _ kibur - (5)
13. Tebur tembar tsüngda jatepba - (4)

OLONG PAITEP # 6862 TELANGZÜBA

TIPLEN :

- 1. Semtu, 3. Lepko, 5. Bilem,
8. Ulu, 10. Tsüngpang,
11. Tesangwa, 13. Aoksa,
15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak,
9. Zünga, 10. Temopu,
12. Walu, 14. Ali.

NAI-A YA METETTER MA



Tang asaya aliba Paris Olympics nung Zheng Qinwen-i otsü tasen ka yanglua China nunger asayartem rongnungi tennis asaya nung final atonga mezüngbuba asayar kümogo. Brehostibarnü tetsürtem rongnung world number one asayar Iga Swiatek koka iba otsü tasen yangluogo. Semifinal nung Zheng-i 6-2, 7-5 agi Swiatek kokogo, aser la final nung Croatia tsür Donna Vekic mesüra Slovakia tsür Anna Karolina Schmiedlova den gold medal atema asayatsü.

Manipur police-i IDP rally mapang osangbener ka dak tekasangshi



Imphal, Luroi/August 1 (Agencies): Internally displaced persons (IDPs) temi Manipur yimtiba Imphal nung longkak aitba osang agiba mapang police temi osangbener ka dak kanga mejungi azük.

Osangbener ya local television channel ka indang reporter liasü aser Manipur police-i pa dak azükba sülen pa kanga mejungi yirua liasü.

Imphal yimti kübok Singjamei tesem nung IDPs temi ayongba rally nung adenshia alirtem senshidaktsütsü atema Manipur police-i tear gas khaloktsü aser osangbener ya densema nisung

asem yirua liasü. Committee on Protection of Meitei Victims (COPMeV)-i ayongzükbba rally ya Singjamei kübok Akampat tesem nung agia liasü.

Rally nung shilem agirtem ya timba Manipur-Myanmar arrtsü anasa Tegnoupal district kübok Moreh nungi IDPs tem liasü. Parnok pei linüki odaktsütsü atema tezüluba nung takhangba ka agütsütsü asoshi km ana jaja chief minister indang secretariat-i aotsü sentong yanglur liasü.

IDP camp tem nungi kaketshirtemia iba rally nung shilem agia liasü.

Rally mapang yirurtem iba tesem anasa aliba mozüki kati temang anepalutsü atema anir ao.

Opposition Manipur Congress MLA Kangujam Ranjit-i, police inyakyim ajanga pa kanga aoksaba lemsatepogo.

Ranjit-i Brehostibarnü state assembly budget session zero hour nung police-i tashiyim amshiba indang ashishia liasü.

Iba dak sendakba nung Manipur chief minister N Biren Singh-i state assembly nung ashiba agi, state kübok relief camp balala nung jenoka aliba IDPs tem dak anar nisung kari yimden yimsüsüba tsütsü tajangzüik aginer.

Rohingya nunger tali senoka aitba Assam CM-i süoki ia bilemer

Guwahati, Luroi/August 1 (Agencies): Assam chief minister Himanta Biswa Sarma-i, Indo-Bangladesh arrtsü ajanga Rohingya nunger India-i tali senoka aitba atema süoki ia bilemba lemsatepogo.

Assam CM Himanta Biswa Sarma-i ashiba agi, "Rohingya nungertem India-i aitba tali kümogo. India aser Bangladesh ya yongtsü nung arrtsü junga matsübangi aliba aser security tashimaitba amala inyakyim meshidakba maongka agia parnok aiter."

Sarma-i, Assam-i Indo-Bangladesh arrtsü shilem ka dang kümzüka yuteter ta ashiba den Tripura nung tawa police temi Rohingya nunger aika apuba indang lemsatepa liasü.

"Taoba küm Assam police-i inyakyim ka khaktetogo, koba NIA-i bushisüngdanga liasü," ta pai ashi.

Sarma-i Centre sorkar dang



Assam chief minister Himanta Biswa Sarma

arrtsü nung security akangshitsü takhangba ka agütsüogo, talisa West Bengal nung arrtsü nung security tali akangshitsü khangogo.

Assam chief minister-i ashiba agi, Assam, Jharkhand aser West Bengal amala state tem nung demography melenshidar.

"India anütoklen demography melenshidar," ta Assam chief minister-i ashi.

"Assam nung aliba nüburtemi iba temelenshi

indang meteta lir, saka tanga state temi iba ajanga kongshiba tangang yimdangi arur," ta Assam CM Himanta Biswa Sarma-i ashi.

Paisa, bendanglen nungi kuli kaket tejangja mebeni arurtem anema jenjang tapet magiba atema West Bengal chief minister Mamata Banerjee aitsüogo.

"2019 aser 2024 voter lists medemdangang aser nenoki lokti kar nütsünyongsük tali akümba angutsü," ta pai ashi.

Manipur azütokshi lendong nung asür kinungertem nem sen crore 14.6 agütsüogo: CM

Imphal, Luroi/August 1 (Agencies): Manipur chief minister N Biren Singh-i Brehostibarnü Manipur assembly nung ashiba agi, state nung kin o kin tsüngda mangatetep adokba sülen tanur aser tetsürtem densema nisung 226 taküm samaogo.

Manipur sorkari tang tashi nung iba azütokshi lendong nung asür kinungertem nem teyari sen

crore 14.6 agütsüogo, ta CM Biren Singh-i ashi.

Tang agia aliba Manipur assembly session tanabuba anogo question hour mapang Congress MLA Surjakumar Okram-i ken o ashishiba sülen Manipur CM N Biren Singh-i iba osang ya agüja liasü.

Manipur nung mepetmesü ya taoba küm May 3 nü tenzüik aser tang tashi nung Kuki aser Meitei

nunger nisung 226 süogo.

Central aser Manipur sorkar nati asür kibong 146 nem sen lakh ter ter ta kasasa lemdanger agütsüogo.

Tanungba kibong 80 nem kechiba tang tashi teyari magütsü ta asüngdanga mapang Manipur chief minister N Biren Singh-i ashiba agi, senotsü teyari tagütsüdak lir aser kuli balala ajanga tang tashi magütsümai lir.

ACHIEVERS ACADEMY
THE DREAM DESTINATION OF ALL NPSC ASPIRANTS

**GOOD NEWS DEAR MOKOKCHUNG ASPIRANTS,
BRINGING SUCCESS TO YOUR DOORSTEP**

**THE FIRST UPSC / NPSC / NSSB INTEGRATED BATCH
FOR ACHIEVERS ACADEMY MOKOKCHUNG CENTRE
IS STARTING TENTATIVELY ON 19 AUGUST 2024**

BE THE PIONEERS WHILE GRABBING THE EARLY BIRD DISCOUNT

First 1 - 5 Bookings ₹20,000 Discount
First 6 - 15 Bookings ₹15,000 Discount
First 16 - 30 Bookings ₹10,000 Discount

ADMISSION IN FULL SWING

Above THE RESTAURANT
ARKONG Ward, MOKOKCHUNG
9378129625 / 7005526011

Azüdokshiba mechi Bangladesh-i Jamaat-e-Islami telok nokdang

Dhaka, Luroi/August 01 (Agencies): Sorkar mapa nung quota atema tawa kaketshir temi longkak aitba mapang azüdokshi nung shilem agiba atema Bresthostibarnü Bangladesh sorkari radical Islamist group Jamaat-e-Islami aser iba indang youth wing, Islami Chhatra Shibir nokdangogo.

Taoba ita Students Against Discrimination ajanga linük tesem ajunga nung longkak aita police temi nisung aika apu aser nisung 206 sür tembang. Iba radical Islamist telok, koba Bangladesh nung Islamist telok tulutiba lir, parnoki longkak aitba 'hijack' asü aser parnoki anir osettsüset auya, azüdokshi aser osettsüset raksatsü, ta Sheikh Hasina-i aniba sorkari ashi.

Sorkari executive order agütsüba sülen iba telok aser par youth wing ya Anti-Terrorism Act of Bangladesh indang Section 18(1) kübok nokdanga liasü.

"Iba totuyuba agütsüba sülen item telok ya political

party ama meinyaktettsü," ta Bangladesh law minister Anisul Haque-i osangbener dang ashi.

Iba telok yagi 1971 Liberation War mapang Pakistan Army den lungjemer inyak aser Pakistan nungi nüjiso bushir freedom fighter bushia tepsetba nung Pakistan Army yari, nisung aika tepset aser reshikangshi aser 1971 rara nung Bangladesh-i akokba nung yariba muktijoddhas (freedom fighters under Sheikh Mujibur Rahman) aser Indian Army den raratsü training agüja liasü.

Muktijoddhas aser Indian Army kübok Pakistan Army tamakok anguba sülen iba telok nungi lenir aika Pakistan-i jena ao. Par lenir Delwar Hossain Sayeedi, Muhammad Kamaruzzaman, GhulamAzam aser Ali Ahsan Mohammad Mojaheed nunger nem 2013 Shahbag Protests sülen war crimes mechi tasüba temerenshi agüja liasü.

Iba telok yagi Razakar aser

Al-Badr brigades tenteta rara mapang mapa tamajung inyak aser Hindu aser Muslim tsür tem dak tashiyim amshia shi nung medema kin ajunga samatsütsü meranga tepset aser reshikangshia amshi.

Iba telok yagi ano tamangba yimsü nung ajemdaker nüburtem reshikangshia amshir ta tai tonglokja lir. 2013 küm Bangladesh International Crimes Tribunal (ICT) ajanga iba telok lenir Delwar Hossain Sayidee nem tasüba temerenshi agütsüba sülen iba telok yagi Bangladesh nung Hindu nunger tekülem ki 50 dak tema rondoktsü aser kin tila tem daka amak.

Iba telok ya Al Qaeda dak nungi angazükba Bangladesh nung Ansarullah Bangla Team (ABT) den tesendaktep lir ta aitsür. ABT yagi 2013 aser 2015 tsüngta etheist, freethinkers aser LGBTQIA+ activists aika tepsetogo. Iba telok ya Shafiqur Rehman lenisüba kübok lir.

Trump-i Harris ya India tsür asü sentsü tanak nisung ta asüngdang

Chicago, Luroi/August 01 (Agencies): Black journalists' convention ka nung shilem agidang United States indang taoba tir aser 2024 Republican presidential nominee Donald Trump-i pa den tokteptsü alila Kamala Harris ya India tsür asü sentsü tanak (Black) nisung ta asüngdanga liasü.

Bodhbarnü Chicago nung National Association of Black Journalists senden ka nung jembidang pai US vice president ya mapang talangka nungi meteta liasü ta ashi.

"La ya teti India nungi jakzükba ka liasü aser India nunger senmangren indang dang jembia inyaka liasü. Küm ishika jakdang ang la Black akumba ni memeteti liasü aser tangbo la Black ama südaktünner," ta pai ashi.

"Anungji la ya India tsür asü Black ar ni memetet. Ni anaprong akumtsübor, saka labo yamaji masü," ta Trump-i ashi.

Arishi küm 59 tain Harris-i mapang talangka nungi la ya Black aser South Asian tsür ta lasasa ayak jangja aru. La ya Oakland, California nung aso aser la tetsü ya India nung aso aser tebu ya Jamaica nung aso aser US puti otsü nung la ya mezüngbuba Black aser mezüngbuba Asian-American vice president alitsü.

Tir Joe Biden-i US tir election nung toktepa anenba sülen lai July ita tetenzüklen nungi White House asoshi nübuyimba mapang online nung la aitsür jenti ajangshio.

Bodhbarnü Trump-i jembiba ya kanga kera aitsür liasü aser White House Press Secretary Karine Jean-Pierre-i item o yagi dangar temulung yirutsür aser mezüngmeshi lir ta ashi.

"Shingaiia dangar dang parnok kong nungi aru aser parnok tereprangtsü kechi, yamalaji ashitsü temeden mali," ta Jean-Pierre-i osangbener dang ashi.

US House of Representatives nung US Virgin Island nungi züngsem Stacey Plaskett-i social media post nung Trump-i jembiba ya tiazü, akumtsübo mali, kin ka maksütsüba, osang tejangja memetetba, telemsa adokdaktüsüba, mashi-maluba sayur dang lir ta ashi.

Harris campaign indang odongtar kati sangdong ka nung toba tiri jembiba ajanga pa arishi tepiyong, office nung inyak tepiyong aser tir atema nübuyimba tepiyong tejashi aliba indang sayur, ta ashi.

"Donald Trump-i America melungjemtetsü ta sayutetogo, anungji pai asenok tsüngta telemsa adokdaktüsüba meranger. Tanü pai ain adoka jembiba ya iba campaign tepiyong Trump indang MAGA rallies nung temaitsü ka ama rongrongshirong aser telemsa adokdaktüsüba angur dang lir," ta sangdong ajanga ashi.

(Maneni tapak 8 nung...)

OFFICE OF THE
MERANGKONGTSÜR TELONGJEM TULI
P.O. Tuli Town - 798618
Dist. Mokokchung, Nagaland - 798618
Nükjidong: "Telongjem Aser Teyaritep"

TENÜNGSANG AGÜTSÜR

Merangkongtsür Telongjem Tuli ajanga Mrs. Watisangla, Lt. Mr. Tsuknungrensang aser Lt. Mrs. Maongkala na jalai The Nagaland State Co-operative Bank Ltd. (NSCB) nung Branch Manager tongtetba asoshi tenüngsang agutsur. Anungji tarutsü mapangtem asoshi nu wadang nung Tsüngremi len aniang ta sarasadema atar.

Sd/-
Wt. K. Temsunaro Jamir
President, MTT

Sd/-
Wt. Toshimongla
General Secretary, MTT

2026 AKM
LOCAL PLANNING COMMITTEE
Hq. Chungtia, P.O. Mokokchung: 798601, Nagaland.
"For the Nation"

Lucky Draw Results

In aid of 70th Ao Students' Conference Chungtia, 2026

1st Prize : Rs. 3,00,000 - Serial Number : 16067
2nd Prize : Rs. 2,00,000 - Serial Number : 07758
3rd Prize : Rs. 1,00,000 - Serial Number : 03086

Consolation Prizes : Rs 10,000 each / 25 No.

05108	07203	11652	03485	07356
10558	12575	18842	16424	07472
09011	18892	12094	11348	10163
03699	16997	01381	09867	07495
09832	14049	10340	09575	08502

Iran Supreme Leader Ayatollah Ali Khamenei-i Israel amaktsü tuyu

Tehran, Luroi/August 01 (Agencies): Bodhbarnü Tehran nung Hamas tanishir Ismail Haniyeh tepsetba atema telangzüba agükja Israel amaktsü Iran indang Supreme Leader Ayatollah Ali Khamenei-i totuyuba agütsüogo, ta osangtem ajanga ashir.

Haniyeh asüba osang sangdonger mapang tatsüka lir Bodhbarnep Iran indang Supreme National Security Council ajungben senden amendang Khamenei-i Israel amaktsü temelaba agütsü.

Hamas lenir ya Tehran nung Iran tir tasenba Masoud Pezeshkian tezüngzüktepa agiba sentong nung adentsü arua liasü. Pa ya iba sentong nung dener Khamenei den senden ka amenba sülen anepdang 2:00 ako (par mapang) meta tepset.

Haniyeh tepsetba atema Iran aser Hamas-i Israel tenüng asener. Ajisüaka Israel-i Haniyeh asüba nung shilem agia aliba mashir aser shilem magi ta mashir.

Iran indang supreme leader aser armed forces indang commander in chief Khamenei-i Revolutionary Guards aser army nungi tanishirtem dang rara tuluba kuma Israel mesüra United States-i Iran ya akumnungbo parnokia amaktsü aser linük kumzükba ayutsü atema tasa yanglutsü totuyuba agütsü ta ketdangtsür temi ashi.

"Iran yagi komala tashi amshia telangzüba agütsütsü aser parnoki amakba ajanga tensa tamajungba akumtsü asü masü, itemji mejangja. Iran mitkar tanishir temi ano drones aser millsiles amshia Tel Aviv aser Haifa nung military targets amaktsü asadanger, saka civilian dak mamaktsüsa

inyaktsü," ta Iran ketdangtsür temi The New York Times dang ashi.

Ano parnoki Iran aser Yemen, Syria aser Iraq ama allied sepaitem aliba danga tesemtem nung amaktsü asadanger ta ketdangtsür temi ashi.

Israel yagi Iranian nuclear scientist aser military commanders tem dena bendang liba nung tsükchirtem tepsetba otsü lir, ta The New York Times ajanga ashi.

Gaza nung ita ter jungnüa raraba mapang Iran-i kanga kumdanga Israel nem khuret tali agüja region nung par tembar aser proxy firces ajanga amaker saka linük ana tsüngta rara metenzükdaktüsütsü meranger.

Iran-i Israel dak tesüsa amakba ya Israel-i Damascus, Syria nunger par embassy compound amakba tayang kepzüka April ita missiles aser drones amshia amakba liasü. Israel-i Damascus nung Iranian embassy amakdang Iran nunger mitkar tanishir kar asü.

Khamenei-i yimjak nung jembidang Iran-i tayang kepzüksü ta angatetsüsa "pa zü tokshiba mapang ayangtsü asen mapa lir" kechiaser ibai Iran li nung atalok, ta ashi.

Temerenshi tulu agütsü Israel-i lenmang lapoktsüogo, ta pai tekumdangtsü ashi.

Tir tasenba Masoud Pezeshkian, foreign ministry, Revolutionary Guards aser Iran indang UN mission densema Iran ketdangtsür balalai Israel amaktsü aser pei temeden nung aibelenba nungi kumzükba ayutsü tashi aser temeden lir, ta yimjak nung sangdonga lir.

(Maneni tapak 8 nung...)

